

SAILBURUA
LA CONSEJERA**AGINDUA, 2019KO OTSAILAREN 4KOA, LAN ETA JUSTIZIAKO SAILBURUARENA, HONAKO HAU ALDATZEN DUENA: 2018KO URRIAREN 16KO AGINDUA, ZEINAREN BIDEZ BERMATZEN BAITA GARBIALDI SA ENPRESAKO LANGILEEK SEGURTASUN SAILEKO POLIZIA-BULEGOETAN GIZARTEARI EMATEN DIZKIOTEN EZINBESTEKO ZERBITZUAK BETE EGINGO DIRELA.**

2018ko urriaren 16an, Garbialdi SA enpresako langileek Segurtasun Sailaren Gipuzkoako polizia-bulegoetan gizarteari ematen dizkioten ezinbesteko zerbitzuak beteko direla bermatzeko agindua ezarri zen, ELA, UGT, ESK eta LAB erakunde sindikalek aurkeztutako greba-deialdiarekin lotuta (deialdi mugagabea egin zen 2018ko urriaren 17tik aurrera), deialdiaren egileek adierazi bezala, ez dagoelako akordiorik Segurtasun Sailaren menpeko Gipuzkoako eraikin eta lokaletan lan egiten duten pertsonen eta enpresaren arteko hitzarmenean gauzatzen ari diren negoziazioetan, enpresak akordio bat onar dezan, hitzarmen honetako langileak arautzeko eta hainbat alderdi aurreikusteko (besteak beste, soldata-hobekuntzak, kontratazioko hobekuntzak, hitzarmena ez aplikatzeko adostutako klausulak eta abar).

Gogoratu beharra dago deialdi honen aurretik beste bi greba-deialdi egin zirela, 2018ko irailaren 19tik urriaren 3ra eta 2018ko urriaren 4tik 16ra, eta horien zioz ezarri zirela 2018ko irailaren 21eko Agindua eta 2018ko urriaren 2ko Agindua.

Gainera, nabarmentzekoa da eraikin judizialako baldintzen zioz sortu ziren kexen eta salaketen ondorioz bilera bat egin zela 2018ko abenduaren 19an Gipuzkoako Lurralde Ordezkaritzan, eta bertan, akordio bat lortu zela, 2018ko urriaren 16ko Aginduan ezarritakoaren harira sortu ziren gatazkak ebazteko.

Eusko Jaurlaritzak Garbialdi SA enpresa kontratatu du Gipuzkoako Lurralde Historikoko Segurtasun Sailaren polizia-bulegoetan garbiketa-zerbitzua emateko.

Bi aginduen azalpenen zatiko bigarren atalaren arabera, ezarritako gutxieneko zerbitzuak aldatu ahal izango dira grebaren iraupenagatik, edo arrazoi higieniko biosanitarioak edo bat-bateko ezohiko arrazoiak direla-eta ezinbestekoa baldin bada, administrazio-izapide egokiak bete ondoren.

Aurkeztutako salaketak eta kexak kontuan hartuta, Gipuzkoako Lan Ikuskaritzak hainbat ikuskapen-bisita egin ditu ukitutako lokaletara.

Hala, 2018ko urriaren 5ean ikuskapen-bisita egin zen Gipuzkoako Ertzaintzako Bulego Nagusira (Oartzunen) eta Tolosako eta Hernaniko Ertzainetxeetara, eta horien gainean, espedientean agertzen den txostena idatzi da. Txosten horretan egiaztatutakoaren arabera, baldintza higienikoak ez dira egokiak bulegoetako



batzuetan, eta aztertutako zentroetako sukalde- eta jangela-instalazioetan egoera desatsegina da (usain txarrak daude). Baieztatzen duenez, gainera, Oiartzungo zentraleko sukaldean eta jangelan baldintza higienikoak ez dira egokiak, horietatik hurbil zaborra pilatzen baita (organikoa eta ez organikoa). Aldagelen egoera onargarria da, baina grebak jarraitu egiten badu, horien erabilera baldintzatu ahalko da.

Ondoren, hainbat datatan, bisitak egin dira Segurtasun Sailaren menpeko hainbat bulegotara; zehazki, 2019ko urtarrilaren 17an bisitatu ziren Oiartzungo Lurralde Zentrala eta Irungo Ertzainetxea, 2019ko urtarrilaren 18an Hernaniko Ertzainetxea, 2019ko urtarrilaren 23an Bergarako eta Eibarko Ertzainetxeak eta 2019ko urtarrilaren 24an Tolosako Ertzainetxea. Bisita horien gainean txosten egokia egin zen, espedienteetan sartu dena eta honako hau ondorioztatzen duena:

- *Aztertutako instalazioetan lan-arloko deserosotasuna gailentzen da, ordena- eta garbiketa-faltagatik, eta sentsazio hori areagotu egin da grebaren hasieraz geroztik igaro den denboraren zioz.*
- *Baldintza higienikoak ez dira egokiak langileen zerbitzura dauden instalazioetan (aldageletan, dutxetan, komunetan). Usain txarra dago, giroa kargatuta antzematen da, eta material higienikoa aldatzea falta da. Baldintza higienikoak ez dira egokiak jantokiaren instalazioetan. Zikinkeria eta usain txarrak nabari dira, eta elikagaien eta vending-eko produktuen hondarrak daude lurrean, mahaietan eta sukaldean.*
- *Zabor-edukiontzia zikinkeriaz beteta daudenez, zabor-poltsak daude metatuta langileen pasabiderako edo egonaldirako diren guneeetatik hurbil. Poltsa horietan hondar organikoak daude (elikagaiak, ontziak, vending-eko hondakinak), eta, ondorioz, usain txarrak eragiten dituzte eta intsektuak eta karraskariak erakartzen. Gune saturatu batzuetan, edukiontzia eta zabor-poltsak falta direnez, langileek zuzenean lurrean uzten dituzte hondarrak.*

Txosten horietan adierazikoa kontuan hartuta ondorioztatu daitekeenez, Eusko Jaurlaritzako Segurtasun Sailaren Gipuzkoako bulegoen egoera nabarmen kaltetu da dagoeneko 138 egunera luzatu den grebaren ondorioz (iazko irailaren 19tik), eta arrisku higieniko sanitarioa areagotzen joan da, bulego horietan egunero lan egiten duten pertsonentzat eta orokorrean horien erabiltzaile diren pertsonentzat arriskutsua izateraino. Halaber, hutsuneak antzeman dira alderdiek 2018ko abenduaren 19an sinatutako akordioaren betearazpenean, gutxieneko zerbitzuak mintzagai, ez baitira jaso materia organikoz kutsatuta egon daitezkeen edozein motatako hondakinak, berriaz adostu zen eta aktan agertzen den bezala. Gainera, hondakin horiek oraindik ere jaso gabe jarraitzen dute. Hori dela eta, beharrezkoa da 2018ko urriaren 16ko Agindua aldatzea, eta, beraz, gutxieneko zerbitzuak handitzea eta aparteko garbiketa-zerbitzua eskatzea Segurtasun Sailaren Gipuzkoako lurraldeko polizia-bulego guztietan.



Lan Harremani buruzko Errege lege-dekretuaren (martxoaren 4ko 17/1977 Errege lege-dekretuaren) 10.2. artikulua honako hau xedatzen du: «greba egiten denean edozein zerbitzu publiko edo onartuta dagoen eta geroraezina den beharriazko edozein zerbitzu eskaintzeko enpresetan, eta larritasun bereziko egoerak daudenean, gobernu-agintaritzak beharrezko neurriak hartu ahal izango ditu zerbitzuen funtzionamendua ziurtatzeko» eta «Gobernuak, era berean, horretarako beharrezkoak diren esku-hartzezko neurriak har ditzake».

Apirilaren 11ko 84/2017 Dekretuaren (Lan eta Justizia Sailaren egitura organikoa eta funtzionala ezartzen duenaren) 3.1. artikulua Lan eta Justiziako sailburuari aitortzen dizkio azaroaren 26ko 24/2016 Dekretuan jasotako eskumenak (24/2016 Dekretua, azaroaren 26koa, Euskal Autonomia Erkidegoaren Administrazioako sailak sortu, ezabatu eta aldatzen dituen eta horien egitekoak eta jardun-arloak finkatzen dituen). Dekretu horren 16. artikuluan, Lan eta Justizia Saila sortzen da, eta, beste egiteko eta jardun-arlo batzuen artean, lan-arloko legeriak lan-harremani buruz ezartzen duena egikaritzeko egitekoa esleitzen zaio, eta ekainaren 11ko 139/1996 Dekretuaren bidez eskuordetzen zaio zerbitzu publikoak edo premia biziko eta atzeraezineko zerbitzuak eskaintzeko ardura duten enpresa, entitate eta erakundeetan greba-eskubidea baliatzen dutenean autonomia-erkidegoko ezinbesteko zerbitzuei jardunean eutsiko zaiela ziurtatzeko beharrezko diren neurriak ezartzeko eskumena.

Horregatik guztiagatik, Lan eta Justiziako sailburuak, Eusko Jaurlaritzaren ordezkari gisa, honako hau

EBAZTEN DU:

LEHENEA. - GARBIALDI SA enpresak, Segurtasun Sailaren Gipuzkoako polizia-bulegoetako garbiketa-zerbitzuaren esleipenduna denak, aparteko garbiketa-zerbitzua emango du (metatutako hondakinak jasoko ditu eta, ondoren, gunea garbituko) Segurtasun Sailaren Gipuzkoako polizia-eraikin eta -lokal guztietan, eta, zehazki, honako hauetan:

- Oiartzungo Lurralde Zentrala.
- Irungo Ertzainetxea.
- Tolosako Ertzainetxea.
- Hernaniko Ertzainetxea.
- Bergarako Ertzainetxea.
- Eibarko Ertzainetxea.

Aparteko garbiketa horretan, nolana ere, honako zeregin hauek sartuko dira: instalazio higieniko sanitario guztien (bainugelak, jantokiak, aldagelak eta abar) garbiketa eta desinfekzioa, gainerako instalazioen garbiketa (eskailerak, korridoreak, bilera-gelak, bulegoak eta abar), eta era guztietako hondakinen bilketa, bai materia organikoena, bai ez organikoena.

Aparteko garbiketa-zerbitzu hori berehala egingo da, beharrezkoa den denboran, amaitu arte, eta zeregin hori betetzeko beharrezkoa den enpresako langile-hornidura erabiliko da horretarako.



BIGARRENA.- 2018ko urriaren 16ko Aginduko azalpenen zatian ezarritako gutxieneko zerbitzuak bete egingo dira, alderdiek 2018ko abenduaren 19an izandako bileran adostutako akordioan jasotako zehaztapenekin.

HIRUGARRENA.- Azaldutakoaren ondorioz, Agindu hau indarrean jarriko da jakinarazten den unean, eta orduan izango ditu ondoreak.

LAUGARRENA.- Agindu honen berri eman behar zaie interesdunei, urriaren 1eko 39/2015 Legeak (Administrazio Publikoen Administrazio Prozedura Erkidearenak) 40. artikuluan xedatutako moduan; halaber, ebazpenak administrazio-bidea agortzen duela jakinarazi behar zaie, eta horren aurka administrazioarekiko auzietarako errekurtsua jarri ahal izango dela Euskal Autonomia Erkidegoko Auzitegi Nagusiaren dagokion salan, ebazpena jakinarazten denetik kontaktzen hasita 2 hilabeteko epean, Administrazioarekiko Auzien Jurisdikzioa arautzen duen Legean (uztailaren 13ko 29/1998 Legean) xedatutakoaren arabera.

Halaber, eta urriaren 1eko 39/2015 Legeak (Administrazio Publikoen Administrazio Prozedura Erkidearenak) 123. eta 124. artikuluetan xedatuari jarraikiz, jakinarazi egingo da agindu honen aurka aukerako berraztertze-errekurtsua aurkez daitekeela, lan-agintaritzan, hilabeteko epean, agindua jakinarazi eta hurrengo egunetik kontaktzen hasita.

Vitoria-Gasteiz, 2019ko otsailaren 4a.



LAN ETA JUSTIZIA
SAILA
MARIA JESÚS CARMÉN SAN JOSÉ LÓPEZ
DEPARTAMENTO DE TRABAJO
Y JUSTICIA
LAN ETA JUSTIZIAKO SAILBURUA